

**U ovom broju, između ostalog, čitajte:**

- **Osnovati neovisno tijelo za implemenatciju Projekta "Jačanje poslovnog okruženja"**
- **Migrantska kriza ugrožava privredne aktivnosti u USK**
- **UPFBiH i KULT pokrenuli Projekat "Poboljšanje ljudskih prava u privrednom sektoru"**
- **UPFBiH uputilo komentare na Odluku o izmjenama Odluke o obaveznoperefencijalnog tretmana j primjeni domaćeg**
- **Dogovoren način implementacije Projekta „Izrada i promocija Vodiča za samozastupanje za mikro, male i srednje kompanije“**
- **Predstavnici UPFBiH imenovani za posmatrače u Odbor Agencije za javne nabavke BiH**
- **Besplatna radionice za članice UPFBiH o digitalnom marketingu**
- **Premijer Forto sa članovima UO UPKS: Uskoro zajednička tematska sjednica**





## Osnovati neovisno tijelo za implemenatciju Projekta "Jačanje poslovnog okruženja"



Tim Svjetske banke predvođeni voditeljima Projekta Ruvejdom Aliefendić i Anwarom Aridijom, pozvao je predstavnike Udruženja poslodavaca Federacije Bosne i Hercegovine na konsultacije i razmjenu informacija u vezi Pro-

jekta „Jačanje poslovnog okruženja“ čiji je budžet 60 miliona dolara.

Glavni cilj projekta je povećati konkurentnost i produktivnost firmi, kao i poboljšati poslovni ambijent, a tema sastanka, održanog 11. februara 2019. godine u prostorijma Svjetske banke u Sarajevu, je bila razmjena informacija u vezi potražnje za proizvodima podrške malim i srednjim preduzećima koju planiraju ponuditi, te o programima projekta i aranžmanima za implementaciju.

Poslodavci su istakli problem neadekvatnog sistema obrazovanja koji proizvodi nekvalificiranu radnu snagu, kao i odlazak mladih i radno sposobnog stanovništva. Također, veliki problem predstavljaju duge i komplikovane administrativne procedure, visoki

nameti i složen porezni sistem. Navedeno je da su potrebne inovacije i ulaganje u tehnologiju, kadrove i promociju. Istakli su da poslodavci iz BiH nisu međunarodno konkurentni jer država destimuliše poduzetništvo i poslodavce.

Poslodavci su izrazili bojazan, budući da će se projekat implementirati preko državnih tijela, da sredstva neće otići korisnicima kojima su

neophodna, odnosno da će, po ustaljenoj praksi, javni sektor biti u povlaštenijem položaju od realnog.

Direktor Udruženja poslodavaca FBiH Mladen Pandurević predložio je da se osnuje neovisno tijelo kako bi se postigla održivost projekta, odnosno, kako bi se vodilo računa o ravnopravnom tretmanu javnog i realnog sektora.




## Migrantska kriza ugrožava privredne aktivnosti na području USK

Udruženje poslodavaca Federacije Bosne i Hercegovine i Grupacija poslodavaca Unsko-sanskog kantona pri UPFBiH upozoravaju na sve složeniju ekonomsku situaciju na području Unsko-sanskog kantona i smanjenje privrednih aktivnosti na području ovoga kantona, koje je najvećim dijelom uzrokovano migrantskom krizom koja je najviše izražena na području USK.



„Smanjenje poslovnih aktivnosti na području Unsko-sanskog kantona dodatno usložnjava migrantska kriza i prisustvo velikog broja migranata.

Neadekvatno rješavanje statusa migranata rezultiralo je povećanim stepenom nesigurnosti. Posebno zabrinjava činjenica da je u prošloj godini primjećeno značajno povećanje broja mladih, obrazovanih ljudi sa područja USK koji odlaze u treće zemlje, koje opet svoje uzroke ima u smanjenju poslovnih aktivnosti, smanjenju investicija u uslovima vrlo složene situacije na području USK uzrokovane migrantskom krizom", ističu iz UPFBiH i Grupacije poslodavaca USK.



Dalje navode da su Unsko-sanski kanton, a naročito grad Bihać na čijoj teritoriji se nalazi jedini Nacionalni park u FBiH, Nacionalni park Una, u svojim razvojnim strategijama naročit akcenat stavili na jačanje turističke ponude i turističkih potencijala, čime bi se dodatno razvijale i druge privredne djelatnosti. Postoji opravdana bojazan da će se stalno prisutna migrantska kriza negativno odraziti na dolazak turista u USK i razvoj turizma, čime će direktno i indirektno biti ugrožene i druge privredne grane sa područja ovog kantona.

Migrantska kriza je i jedan od najvećih razloga zbog kojih u prošloj godini na području USK gotovo da nije bilo značajnijih investicija, kojih je i inače u ovom dijelu BiH u prethodnom periodu bilo nedovoljno.

„Nažalost, nema naznaka da bi se situacija kada je u pitanju migrantska kriza u ovoj godini mogla popraviti. Naprotiv, iz relevantnih izvora smo saznali da IOM na području USK već planira svoje aktivnosti za naredne tri i više godina. Neadekvatna podrška državnih institucija da se formalno-pravno riješe problemi sa migrantima, stalni ekscesi i nezadovoljstvo migranata uvjetima i statusom, vrlo brzo bi mogli dovesti do eskaliranja krize, što bi u još većoj mjeri ugrozilo privredne aktivnosti na području USK", upozoravaju iz UPFBiH i Grupacije poslodavaca USK pri UPFBiH.

UPFBiH i Grupacija poslodavaca Unsko sanskog kantona pri UPFBiH pozivaju nadležne državne i entitetske institucije da ulože dodatne napore kako bi se pitanje migranata na području USK sistemski riješilo, naročito u pravcu jačanja sigurnosnih mjera. Također se traži da se poticajnim mjerama pomognu kompanije sa područja USK u kojima je zbog migrantske krize zaustavljen rast, razvoj i nova zapošljavanja.

## Udruženje poslodavaca FBiH i KULT pokrenuli Projekat "Poboljšanje ljudskih prava u privrednom sektoru"

Kako bi se osiguralo veće poštivanje ljudskih prava u privrednom sektoru, Institut za



razvoj mladih KULT je uz finansijsku podršku Evropske unije i Udruženjem poslodavaca FBiH pokrenuo Projekat "Poboljšanje ljudskih prava u privrednom sektoru".

Ugovor o partnerstvu, 11. februara 2019. godine, potpisali su direktor Udruženja poslodavaca Federacije Bosne i Hercegovine Mladen Pandurević i izvršni director KULT-a Jasmin Bešić. Podrška na projektu su kompanija Coca Cola BiH i Ministarstvo ljudskih prava i izbjeglica BiH.

Namjera inicijative je promovisati načela o poslovanju i ljudskim pravima u BiH. Istovremeno se želi pokrenuti politički i institucionalni dijalog o izradi državne agende o poslovanju i ljudskim pravima. Projekat će promovisati i zagovarati provedbu programa za korporativno volontiranje koji pomažu bh. preduzećima u zaštiti ljudskih prava te podržavaju pristup marginaliziranih grupa njihovim pravima.





U okviru inicijative bit će realizovano i istraživanje o poštivanju ljudskih prava u bh. privrednom sektoru, a rezultati istraživanja poslužili bi kao polazna osnova kreiranja smjernica koje će voditi ka poboljšanju stanja u

ovoj oblasti. Projekat se implementira od početka 2019. godine i traje 30 mjeseci.

## **UPFBiH uputilo komentare na Odluku o izmjenama Odluke o obaveznoj primjeni preferencijalnog tretmana domaćeg**

Udruženje poslodavaca FBiH je početkom februara dostavila članicama Odluku o izmjenama Odluke o obaveznoj primjeni preferencijalnog tretmana domaćeg s ciljem dostavljanja sugestija, primjedbi i komentara.

Na osnovu pristiglih komentara od svojih članica, putem eKonsultacija, Udruženje poslodavaca FBiH uputilo je primjedbe na Odluku o izmjenama Odluke o obaveznoj primjeni preferencijalnog tretmana domaćeg. Primjedbe Udruženja odnose se na prijedlog rješenja koji imaju za cilj da se smanji mogućnost zloupotrebe preferencijalnog tretmana domaćeg.

## Dogovoren način implementacije Projekta „Izrada i promocija Vodiča za samozastupanje za mikro, male i srednje kompanije“




Direktor i sekretar Udruženja poslodavaca FBiH Mladen Pandurević i Marsiha Jusić održali su sastanak sa direktoricom Asocijacije za demokratske inicijative Sarajevo Snježanom Ivandić Ninković i

saradnicom, vezano za implementaciju projekta „Izrada i promocija Vodiča za samozastupanje za mikro, male i srednje kompanije“ koje zajedno sprovode ove dvije organizacije.

Cilj Vodiča je upoznati malo i srednje poduzetništvo sa sudskim procesima, te pružiti odgovore na pitanja koje bi ovakve kompanije mogle imati prije nego što odu na sud, to će im omogućiti da razumiju sudske procese i pomognu im odlučiti hoće li pokrenuti sudski postupak. Vodič je namjenje malim i srednjim kompanijama.

Na sastanku su dogovorene aktivnosti i zaduženja partnera na Projektu koji je počeo sa implementacijom u februaru 2019. godine.





## **Predstavnici Udruženja poslodavaca FBiH imenovani za posmatrače u Odbor Agencije za javne nabavke BiH**

Predstavnici Udruženja poslodavaca FBiH imenovani su za posmatrače u Odbor Agencije za javne nabavke BiH, prema članu 92. stav 8. Zakona o javnim nabavkama („Službeni glasnik BiH" broj 39/14).

Rješenjem o imenovanju posmatrača u Odbor Agencije za javne nabavke BiH, na mandat od pet godina, počevši od 29.12.2018. godine, za posmatrače u Odboru Agencije imenovani su Mladen Pandurević i Mersiha Jusić.

Odbor Agencije ima pet članova koji su predstavnici Ministarstva finansija i trezora Bosne i Hercegovine, Federalnog ministarstva finansija, Ministarstva finansija Republike Srpske, Direkcije za evropske integracije Bosne i Hercegovine te predstavnici Vlade Brčko Distrikta Bosne i Hercegovine. Posmatrači u odboru Agencije su predstavnici Vanjskotrgovinske komore BiH, udruženja poslodavaca entiteta, nevladinog sektora te direktor Agencije za javne nabavke i predsjedavajući Ureda za razmatranje žalbi.

Odbor Agencije nadležan je da razmatra pitanja u vezi s funkcioniranjem i unapređenjem sistema javnih nabavki, te daje prethodnu saglasnost na akte, kojim se uređuje sistem javnih nabavki, koje donosi Vijeće ministara BiH ili direktor Agencije.

## Besplatna radionice za članice UPFBiH o digitalnom marketingu



Udruženje poslodavaca FBiH je za svoje članice organiziralo besplatnu radionicu "Razvoj i pozicioniranje brenda kroz digitalni marketing i društvene medije" koja je održana 05. februara 2019. godine sa svrhom unapređenje znanja

menadžera o primjeni digitalnih tehnologija i društvenih medija u biznisu u cilju poboljšanja uspješnosti poslovanja, izgradnji brenda i komunikaciji sa kupcima i javnosti.

Radionica je bila usmjerena ka praksi i koncipirana na način da se kombinuju teoretska i praktična znanja, kroz intenzivni rad učesnika na praktičnim primjerima. Radionicu su vodili Suada Peštek, ekonomistka sa 20 godina isustva u marketing i medijskoj industriji i Almir Peštek, profesor digitalnog marketinga na Ekonomskom fakultetu u Sarajevu i na fakultetima u EU, tim sa iskustvom u organizaciji i vođenju treninga u oblasti digitalnog marketinga. Učesnici radionice imali su priliku saznati više o definisanju strategije digitalnog marketinga i izgradnje tima, kako kreirati sadržaje, koje alate koristiti i kako se efikasno oglašavati, te kako komunicirati sa marketinškim agencijama i IT kompanijama.

## Besplatna radionice za članice UPFBiH o digitalnom marketingu



Udruženje poslodavaca FBiH je u partnerstvu sa Srednjom školom za saobraćaj i komunikacije Sarajevo, Srednjoškolskim centrom Vogošća, Javnom

ustanovom „Služba za zapošljavanje KS“, sarajevskim općinama Novi Grad, Novo Sarajevo i Vogošća, te kompanijom Centrotrans dd Sarajevo od 05. februara 2018. do 04. februara 2019. godine implementiralo projekat „Promocija dualnog obrazovanja putem pilot projekta i edukacije“.

Ovaj projekat, zajedno sa 19 lokalnih partnerstava, podržanih u okviru krovnog projekta "Lokalna partnerstva za zapošljavanje u BiH", finansira Europska unija sa četiri miliona eura, a provodi Međunarodna organizacija rada (ILO), s ciljem prekvalifikacije skoro 2.000 nezaposlenih osoba i zapošljavanje najmanje njih 620 u 22 općine u BiH.

Glavne aktivnosti koje su realizovani u projektu su edukacija, pilot projekat dualnog obrazovanja i promotivna kampanja.

Projektni tim je uz pomoć stranog eksperta pripremio i realizovao tri edukacijska seminara o dualnom obrazovanju, s ciljem edukovanja kadrova koji će provoditi i promovisati dualno obrazovanje u školama, kompanijama, općinama i javnim ustanovama za zapošljavanje. Educirano je deset mentora praktične nastave u



kompanijama, deset nastavnika praktične nastave u školama, devet općinskih djelatnika i devet savjetnika za zapošljavanje koji rade sa poslodavcima po modelu dualnog




obrazovanja. Na edukacijskim seminarima učešće su uzeli i predstavnici Ministarstva za obrazovanje, nauku i mlade KS. Na ovaj način, učesnici seminara su, između ostalog, stekli znanja o neophodnosti saradnje škola i kompanija i načinu usaglašavanja kurikuluma i plana praktične nastave, predstavljena su im iskustva dualnog obrazovanja u Njemačkoj i drugim zemljama Zapada, kao i planovi o budućim aktivnostim u vezi sa uvođenjem ovog modela obrazovanja u BiH.

Intencija pilot projekta je bila da kroz praktičan primjer pokaže kako će model dualnog obrazovanja funkcionisati u budućnosti, te su kompanija Centrotrans Eurolines d.d. i Srednja škola za saobraćaj i komunikacije Sarajevo izvršile modifikaciju postojećih



kurikuluma i utvrdile tačan broj nastavnih sati i raspored održavanja praktične obuke u kompaniji za zanimanja vozač motornog vozila, automehaničar,

autoelektričar, autolimar i autolakirer. Osmamnaest učenika Srednjoškolskog centra Vogošća i Srednje škole za saobraćaj i komunikacije Sarajevo su prošli usaglašeni



program obuke u kompaniji Centrotrans. Osam učenika završilo je obuku za vozača motornih vozila, četiri za automehaničara, te po dva za autoelektričara, autolakirera i limara. Praktična obuka u kompaniji Centrotrans Eurolines d.d. je realizovana u periodu od 20.03.2018 do 14.05.2018. godine, a izveli su je iskusni kadrovi kompanije koji su završili mnoge edukacione seminare. Centar za edukaciju u kompaniji je inače certificiran od strane Ministarstva za obrazovanje, nauku i mlade Kantona Sarajevo za obavljanje praktične obuke (dokvalifikacija, prekvalifikacija) što je dalo dodatni kvalitet provedenoj praktičnoj obuci. Težište obuke je bilo na sticanju vještina koje će omogućiti brzo uključivanje u proces rada.

U procesu praktične obuke Centrotrans Eurolines d.d je obezbjedio zaštitnu opremu i finansijsku naknadu, a učenicima je bio obezbijeđen i prevoz, topli obrok, kao i osiguranje.

Za primjenu dualnog sistema obrazovanja od ključne je važnosti privlačenje poslodavaca i preduzeća, kao i uvođenje mehanizama podrške kojima bi se osigurao kvalitet procesa učenja u oba okruženja za učenje. Ali prvenstveno, potrebno je informirati sve učesnike procesa (školske ustanove, poslodavce, učenike, roditelje, službe za zapošljavanje i ostale relevantne institucij), kao i širu javnost o principima dualnog obrazovanja i njegovim benefitima. S tim u vezi, prije implementacije projekta napravljen je komunikacijski plan s ciljevima i alatima komuniciranja, kako bi potrebne informacije dosegle ciljne korisnike. U sklopu promotivne kampanje, sačinjena su dva priručnika o dualnom obrazovanju, printani i distribuirani promotivni materijali uključujući brošuru, letak i plakat, te izrađeni audio i video jinglovi. Napravljen je i film edukacijskog karaktera koji je emitiran na više od deset bh. televizija. Organizovana su

brojna gostovanja na tradicionalnim medijima, a mnogi printani i online mediji su redovno izvještavali o realizaciji projekta.



U sklopu projekta također su otvoreni info pultevi o dualnom obrazovanju u tri sarajevske općine, odnosno u Općini Novo Sarajevo, Vogošća i Novi Grad

Sarajevo, a za učenike završnih razreda osnovnih škola, organizovani su i dani otvorenih vrata Srednjoškolskog centra Vogošća, Srednje škole za saobraćaj i komunikacije Sarajevo i kompanije Centrotrans. Također, Udruženje poslodavaca FBiH je organiziralo i Sajam srednjih strukovnih škola održanog u sklopu Sajma zapošljavanja.

Kroz ovaj projekat dobivena je podrška za realizaciju uvođenja dualnog obrazovanja. Kao mogući insitucionalizovani oblik podrške ovom procesu predloženo je formiranje Savjetodavnog odbora za dualno obrazovanje koje bi u implementaciji pomagalo institucijama odgovornim za realizaciju ovog modela. Potpisivanje Sporazuma o formiranju Savjetodavnog odbora za dualno obrazovanje je planirano u mjesecu martu 2019. godine.

Udruženje poslodavaca FBiH će i u narednom periodu nastaviti sa aktivnostima promocije modela dualnog obrazovanja.



## Sekretar UPFBiH na Kick off meetingu u Ženevi o jačanju kapaciteta socijalnih partnera


U Međunarodnoj organizaciji rada (ILO) u Ženevi 07. i 08. februara 2019. godine, održan je Kick off meeting Projekta ILO-EC „Jačanje uloge i kapacitetat socijalnih partnera i socijalnog dijaloga u novom svijetu rada“.



Sastanku su prisutvovali predstavnici poslodavačkih i radničkih organizacija iz zemalja EU i zemalja regiona, te predstavnici BusinessEurope, Međunarodne organizacije poslodavaca (IOE), Svjetska konfederacija agencija za

zapošljavanje, te predstavnici EUROFOND-a i Univerziteta Salamanca i Linnaeus. Ispred Udruženja poslodavaca FBiH na radionici je učestvovala sekretar Udruženja poslodavaca FBiH Mersiha Jusić.

Cilj projekata je pružanje podrške nacionalnim organizacijama poslodavaca i radnika u Evropskoj uniji generisanjem znanja koje im može pomoći da riješe glavne izazove i iskoriste mogućnosti u svijetu posla koji se mijenja.



Socijalni partneri su imali priliku diskutovati i definisati zajedničke teme vezane za „promjenjivi svijet rada“ na koje bi željeli da se ovaj projekat fokusira.

Na sastanku su na bazi diskusija svih učesnika utvrđene tri zajedničke teme, odnosno, reprezentativnost socijalnih partnera, autonomija socijalnog dijaloga i digitalizacija.

Daljnje aktivnosti projekta će se fokusirati na istraživanje, generisanje znanja i djeljenje nacionalne prakse kroz slijedeće aktivnosti:

- Priprema dokumentacije za navedene teme u konsultaciji sa socijalnim partnerima
- Stručnjaci za ovu oblast u saradnji sa socijalnim partnerima pripremit će nacionalne izvještaje
- Održat će se konferencija početkom 2020. godine, gdje će socijalni partneri na internacionalnom, evropskom i državnom nivou diskutovati o pronalascima, razmjeni nacionalnih praksi i razvoja te o prioritetima diskusije.

Učesnici su zaključili da jačanje uloge socijalnih partnera i socijalnog dijaloga u novom svijetu rada može doprinijeti digitalizaciji i radu na on line platformi, kolektivnom pregovaranju, outsourcing aktivnosti kao nove ekonomske pojave, mehanizmu tripartitne saradnje i nasilje na poslu.

## Premijer Forto sa članovima Upravnog odbora Udruženja poslodavaca Kantona Sarajevo



Vlada Kantona Sarajevo će u saradnji sa Udruženjem poslodavaca Kantona Sarajevo održati tematsku sjednicu na kojoj će biti razmatrana ključna pitanja vezana za rješavanje problema s ciljem poboljšanja

poslovnog ambijenta u ovom kantonu, najavio je premijer KS Edin Forto na sjednici Upravnog odbora Udruženja poslodavaca Kantona Sarajevo.

„U više navrata smo naglasili da ovaj saziv Vlade KS poslodavce posmatra kao ključne partnere bez kojih nema ni države, ni budžeta, niti fondova... Za tematsku sjednicu Vlade Kantona Sarajevo trebate definirati ključne probleme vezane za poslovni ambijent, sa naročitim akcentom na parafiskalne namete koji su u nadležnosti KS. Podsjećamo da je tzv. „šestorka" usvojila oko 300 mjera na čijoj provedbi će raditi u ovom mandatu i među tim mjerama je i ukidanje pojedinih parafiskalnih nameta koji su u nadležnosti KS. Od Udruženja poslodavaca KS očekujem da zajednički definiramo ključne korake s krajnjim ciljem da vi kao poslodavci još više zapošljavate i investirate", istaknuo je premijer Forto u obraćanju članovima UO UPKS.



U nastavku sjednice UO UPKS razmatrano je jačanje kapaciteta UPKS u pravcu definiranja statusa članica Udruženja te angažmana stručnjaka koji bi pomogli u definiranju i zastupanju inicijativa UPKS.

„Imamo priliku da aktivnije saradujemo sa Vladom i Skupštinom KS i da imamo svoje predstavnike u radnim tijelima Vlade i Skupštine, upravnim odborima, tako da mi, kao Udruženje poslodavaca moramo biti spremni sa svojim



inicijativama i prijedlozima, a s ciljem stvaranja kvalitetnijeg poslovnog amijenta, kreiranja novih radnih mjesta, investiranja i smanjenja sive ekonomije", naglasio je predsjednik UO UPKS Safudin Čengiđ.

Na sjednici je prof. dr. Selmo Cikotiđ odrđao đlanovima UO UPKS prezentaciju na temu "Liderstvo u biznisu", a đlanovi su razmatrali i zahtjev Samostalnog sindikata kantonalnih drđavnih sluđbenika i namjeđtanika za ukljuđivanje u aktivan rad Ekonomsko-socijalnog vijeđa KS.


## Tematska sjednica Vlade KS sa predstavnicima Udruženja poslodavaca KS krajem marta

Nakon najave premijera Kantona Sarajevo Edina Forte da će Vlada KS održati tematsku sjednicu posvećenu rasterećenju privrede i poboljšanju poslovnog ambijenta na području ovog kantona, Udruženje poslodavaca Kantona Sarajevo pripremlilo je i premijeru i predsjedavajućem Skupštine KS Elmedinu Konakoviću dostavilo inicijative za formiranje koordinacionog tijela za parafiskalne namete u KS, donošenje uredbe o procjeni uticaja propisa, zatim izmjene i dopune Poslovnika o radu Skupštine Kantona Sarajevo, Poslovnika o radu Vlade KS te inicijativa za uključivanje reprezentativnih socijalnih partnera na području Kantona Sarajevo u upravna tijela i programske savjete.

Inicijative su dostavljene u skladu sa materijalom „Šta poslodavci očekuju od nove vlasti u Kantonu Sarajevo“ – dostavljenom političkim strankama koje učestvuju u radu Skupštine Kantona



Sarajevo, kao i programskim dokumentom „Sporazum o prioritetima skupštinske većine u Kantonu Sarajevo u mandatu 2018.-2022.“



Tematska sjednica Vlade KS sa predstvanicima Udruženja poslodavaca KS održat će se 28. marta 2019. godine sa početkom od 10:00 sati, u zgradi Vlade KS, Reisa Džemaludina Čauševića 1.

Inicijative Udruženja poslodavaca Kantona Sarajevo:

- [Inicijativa za izmjene i dopune Poslodvnika Skupštine KS](#)
- [Inicijativa za formiranje koordinacionog tijela za parafiskalne namete u Kantonu Sarajevo](#)
- [Inicijativa za izmjene i dopune Poslovnika o radu Vlade KS](#)
- [Inicijativa za donošenje Uredbe o procjeni uticaja propisa](#)
- [Inicijativa za uključivanje reprezentativnih socijalnih partnera na području Kantona Sarajevo u upravna tijela i programske savjete](#)

## Angažmanom Grupacije poslodavaca TK pri UPFBiH stavljana van snage Odluke o naknadi za korištenje gradskog i ostalog građevinskog zemljišta

Angažmanom Grupacije poslodavaca Tuzlanskog kantona pri Udruženju poslodavaca FBiH, Gradsko vijeće Tuzla je krajem decembra 2018. godine usvojilo Odluku o stavljanju van snage Odluke o naknadi za korištenje gradskog i ostalog građevinskog zemljišta.

Kako se navodi u Odluci „Ustavni sud FBiH je stajlišta da propisivanje sporne naknade, nije opravdano i nije u javnom interesu, pogotovo imajući u vidu činjenicu da fizička i pravna lica prilikom dodjele gradskog građevinskog zemljišta plaćaju naknadu za dodjelu gradskog građevinskog zemljišta, nakon toga plaćaju naknade jedinicama lokalne samouprave prilikom izadavanja urbanističkih saglasnosti, građevinske dozvole i upotrebne dozvole, te plaćaju različite vrste komunalnih naknada, Pri tome treba uzeti i činjenicu, da i pored plaćanja svih naprijed navedenih naknada, prilikom prometa nekretnina, u ovom slučaju gradskog građevinskog zemljišta, propisana je i zakonska obaveza plaćanja poreza na promet, čija visina prvenstveno zavisi od vrijednosti samog građevinskog zemljišta. Ustavni sud Federacije je zaključio da konkretno ograničavanje, odnosno miješanje u pravo na imovinu propisivanje sporne naknade kao rente koja se naplaćuje doživotno, narušava ravnotežu i fer balans između javnog interesa i zaštite prava na imovinu, i samim tim zaključuje da miješanje u pravo na imovinu nije poduzeto sa legitimnom ciljem u javnom ili opštem interesu". Na ovaj način, zalaganjem Udruženja poslodavaca FBiH, ukinut je još jedan parafiskalni namet, a Odluku možete pročitati [OVDJE](#).



## U sastavu Komisije za provjeru i verifikaciju poslovnih subjekata kod kojih se obavlja praktičan rad i predstavnici UPKS

Na sastanku predstavnika Ministarstva za obrazovanje, nauku i mlade KS, Privredne komore KS i Udruženja poslodavaca Kantona Sarajevo, održanog 21. februara 2019. godine, razgovarano je o Zakonu o obrazovanju odraslih u Kantonu Sarajevo i



Pravilniku o načinu provjere i verifikacije poslovnih subjekata kod kojih se obavlja praktičan rad, te sadržaju i načinu vođenja registra poslodavaca.

Prisutni su zaključili da će sastav stručne komisije koja će utvrđivati da li poslodavci ispunjavaju uslove da se kod njih obavlja praktičan rad, u okviru programa obrazovanja odraslih, činiti predstavnici Privredne komore, Udruženja poslodavaca KS i Ministarstva za obrazovanje, nauku i mlade KS. Troškovi komisije neće padati na teret poslodavaca, rečeno je na sastanku. Razgovarano je i o Zakonu o dualnom obrazovanju koji karakteriše sticanje teorijskog znanja u školi i praktične obuke u preduzećima, a zasnovan je na pozitivnim iskustvima zemalja njemačkog govornog područja. Istaknuto je da je neophodno što prije donijeti zakon u Kantonu Sarajevo i početi sa njegovom implementacijom.

## Finansijska naknada ne može pasti na teret poslodavca po Zakonu o dualnom obrazovanju KS

Predsjednik i direktor Udruženja poslodavaca Kantona Sarajevo Safudin Čengić i Zlatan Dedić razgovarali su o Zakonu o dualnom obrazovanju KS sa pomoćnicom ministra za obrazovanje, nauku i mlade KS Lamijom Husić i projekt menadžericom za srednje



strukovno obrazovanje GIZ-a Isabelom Rapp.

Sastanak je održan u cilju definisanja i kreiranja finalnog Nacrta zakona o dualnom obrazovanju KS.

Dualni sistem obrazovanja podrazumijeva da učenici srednjih stručnih škola osim teoretskog znanja u školama stječu i praktično znanje u kompanijama, za šta trebaju biti i plaćeni. Međutim, iz Udruženja poslodavaca KS ističu da finansijska naknada ne može ići na teret poslodavaca, već da je potrebno pronaći druge izvore finansiranja u kojima će participirati Ministarstvo za obrazovanje, nauku i mlade KS i ostale nadležne institucije Kantona Sarajevo.

U narednom periodu nastavit će se razgovori sa predstavnicima Vlade, odnosno drugih ministarstva, a kako bi se došlo do adekvatnog konačnog rješenja.



## Sajam "Hannover Messe 2019" od 31.03. do 02.04.2019. godine

Predstavništvo njemačke privrede u Bosni i Hercegovini organizuje od 31.03. do 02.04.2019. godine delegacijsko putovanje - posjetu sajmu „Hannover Messe 2019“.

Sajam Hannover Messe je vodeći svjetski sajam industrijskih tehnologija na kojem možete naći sve ključne tehnologije i oblasti industrije na jednom mjestu - od istraživanja i razvoja, industrijske automatizacije i IT-a do dobavljačke industrije, proizvodnih tehnologija i usluga, energije i tehnologija mobilnosti.

U okviru posjete sajmu Hannover Messe učesnicima delegacijskog putovanja nudimo platformu za vođenje individualnih razgovora na izlagačkom štandu DIHK-a (Asocijacija njemačkih industrijskih i trgovinskih komora), hala 27, štand B30/3 (Global Business & Markets).

Pored toga, svi učesnici delegacijskog putovanja će biti predstavljeni na zajedničkom flyeru koji će biti izložen sve vrijeme trajanja sajma na štandu DIHK-a. Iskoristite ovu priliku kako biste sklopili nove poslovne kontakte na vodećem svjetskom sajmu industrijskih tehnologija Hannover Messe!

Broj učesnika je ograničen. Rok za prijavu je 08.03.2019. godine.

[Program, Uslovi učešća i prijava](#)

## XVII proširena sjednica UO UPFBiH

XVII proširena sjednica Upravnog odbora UPFBiH održat će 07. marta 2019. godine u 12:00 sati u Hotelu Bosnia, Kulovića 9, Sarajevo.

### DNEVNI RED

1. Usvajanje Zapisnika sa XVI sjednice Upravnog odbora UPFBiH;
2. Utvrđivanje datuma, mjesta odžavanja i dnevnog reda za XVIII redovnu Skupštinu Udruženja poslodavaca Federacije;
3. Usvajanje završnog račun UPFBiH;
4. Inicijativa za upućivanje u parlamentarnu proceduru Zakona koje je pripremila UPFBiH;
5. Razmatranje Nacrta Zakona o izmjenama i dopunama Zakona o javnim nabavkama;
6. Imenovanje člana i zamjenika člana Koordinacionog odbora za izradu Strategije razvoja Federacije Bosne i Hercegovine 2021- 2027.
7. Prijedlog Skupštini za izbor novih članova Upravnog odbora;
8. Donošenje Odluke za učešće u Projektu „Moj proizvod“
9. Informacija o Projektima:
  - a) ILO- Uspostavljanje web aplikacije za pravnu pomoć
  - b) Svjetska banka- UPFBiH u saradnji sa ADI vezano za pristup sudu za obrtnike i MSP;
  - c) EU – KULT u partnerstvu sa UPFBiH vezano za društveno odgovorno poslovanje u BiH;
10. Tekuća pitanja



## Skupština Udruženja poslodavaca FBiH

Redovna Skupština Udruženja poslodavaca FBiH održat će se 27. marta 2019. godine. Skupštini će prisustvovati oko stotinu uglednih kompanije, predstavnici Unije udruženja poslodavaca RS i Udruženja poslodavaca Brčko Distrikta, kao i predstavnici izvršne i zakonodavne vlasti FBiH. U narednom periodu, delegatima će biti dostavljen dnevni red.

## Sretan Dan nezavisnosti BiH



Našim članicama, poslovnim partnerima i svim građanima Bosne i Hercegovine Udruženje poslodavaca FBiH čestita 1. mart, Dan nezavisnosti Bosne i Hercegovine!



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**